

Արագածոտնի մարզպետ Դավիթ Գևորգյանի ուղերձը Քաղաքացու օրվա առթիվ

Հայաստանի Հանրապետության հպարտ քաղաքացիներ,

Շնորհավորում եմ ՀՀ քաղաքացու օրվա առթիվ:

Քաղաքացու օրը տոն է բոլոր նրանց համար, ովքեր ապրում են մի երկրում, որտեղ իշխանությունը պատկանում է ժողովրդին, որտեղ պաշտպանվում են մարդու և քաղաքացու հիմնարար իրավունքներն ու ազատությունները:

- Մի երկրում, որտեղ ընտրություններն այլևս չեն կեղծվում, որտեղ չկան արտոնյալներ կամ օրենքից վեր կանգնած մարդիկ:
- Մի երկրում, որի տերը շինարարն է, բժիշկը, ֆերմերը, բանվորը, մանկավարժը, երաժիշտը, պատմաբանը ...
- Մի երկրում, որտեղ ծառ կտրելու արատավոր երևույթը փոխարինվել է ծառ տնկելու մշակույթով:
- Մի երկրում, որի իրավագիտակից քաղաքացին նախաձեռնել է անկախ ու անկողմնակալ դատական իշխանություն ունենալու գործընթացը:
- Եվ վերջապես, մի երկրում, որտեղ երկրի տիրոջ իսկ կամքով հիմնահատակ արմատախիլ է արվել կոռուպցիան ու թալանը:

Այսօր տոն է բոլոր նրանց համար, ովքեր պաշտպանել են ՀՀ հպարտ քաղաքացու իրավունքները, պայքարել և նրան են վերադարձրել իրեն պատկանող իշխանությունը: Այսօր տոն է նաև բոլոր նրանց համար, ովքեր թեպետ ֆիզիկապես չէին մասնակցում թավշյա, ոչ բռնի, ժողովրդական հեղափոխությանը, սակայն իրենց մտքում հաղթել էին անարդարությանն ու ապօրինություններին և ողջ հոգով ժողովրդի կողքին էին: Այսօր տոն է Հայաստանի Հանրապետության յուրաքանչյուր քաղաքացու համար:

Մենք բոլորս պարտավոր ենք հավատարիմ մնալ հեղափոխության սկզբունքներին և իրար սատարենք երջանիկ անհատ, հոգատար հանրություն, հզոր պետություն կերտելու ճանապարհին:

Կեցցե՛ հայ ժողովուրդը, կեցցե՛ ազատ, անկախ, երջանիկ ու հզոր Հայաստանը: